

讚

祇園果 滋味甚堪嘗 青瓜紅柿阿梨樣
荔枝龍眼堪供養 菴摩羅果世無雙
婆羅門仙人 親獻蓮臺上
南無普供養菩薩摩訶薩 (三唱)

恭聞

淨五眼之慈尊，赫赫現光明之妙相；開五乘之教海，朗朗宣般若之玄音。五十五位之聖賢，念念菩提果滿；五根五力之大士，塵塵解脫因緣。歸依則增長福田，禮念則消融罪垢。寂然不動，感而遂通；願賜慈光，證明修奉。上來奉為，求懺我等，修崇慈悲道場懺法。茲當第五卷，入壇緣起。謹備燈燭果茗，珍奇妙供；普奉諸佛聖賢，稱禮洪名寶號；稽顙歸依，發露投誠。切念求懺我等，遠從曩劫，直至今生；迷五蘊之去來，隨五濁之流轉。五欲縈纏，五塵交蔽。五逆未除，起人我愛憎之念；五法未悟，增自他煩惱之情。因緣既以無差，業果實難逃避。今則法衆虔誠之志，各開解脫之門；歸依於聖教之中，洗愆於菩提海內。情意如斯，佛必哀憐；仰叩洪慈，冥熏加被。

佛身清淨似琉璃 佛面猶如滿月輝
佛在世間常救苦 佛心無處不慈悲

第五卷入懺

啓運慈悲道場懺法一心歸命三世諸佛
南無過去毘婆尸佛 南無尸棄佛
南無毘舍浮佛 南無拘留孫佛
南無拘那含牟尼佛 南無迦葉佛
南無本師釋迦牟尼佛 南無當來彌勒尊佛

南無懺摩會上佛菩薩（三稱）

慈悲道場懺法卷第五

解怨冤釋結第九

今日道場，同業大眾！一切衆生，皆有怨對。何以知之？若無怨對，則無惡道。今惡道不休，三塗長沸；是知怨對，無有窮已。經言：一切衆生，悉皆有心，有心者皆得作佛。而諸衆生，心想顛倒；貪著世間，不知出要；建立苦本，長養怨根。所以輪回三有，往來六道；捨身受身，無暫停息。

何以故爾？一切衆生，無始以來，闇識相傳；無明所覆，愛水所溺；起三毒根，起四顛倒；從三毒根，起十煩惱。依於身見，起於五見；依於五見，起六十二見。依身、口、意，起十惡行；身殺、盜、淫，口妄言、綺語、兩舌、惡罵，意貪、瞋、癡。自行十惡，教他行十惡；讚歎十惡法，讚歎行十惡法者；如是依身、口、意，起四十種惡。復依六情，貪著六塵；乃至廣開，八萬四千塵勞門。一念之間，起六十二見；一念之頃，行四十種惡；一念之間，開八萬四千塵勞門

。況復一日，所起衆罪？況復一月，所起衆罪？況復一年，所起衆罪？況復終身歷劫，所起衆罪？如是罪惡，無量無邊；怨對相尋，無有窮已。

而諸衆生，與愚癡俱；無明覆慧，煩惱覆心。不自覺知，心想顛倒；不信經說，不依佛語。不知解怨，不望解脫；自投惡道，如蛾赴火；歷劫長夜，受無量苦。假使業報有終，得還人道；如是惡人，終不改革。

是以衆聖，起大慈悲；正為如是，怨對衆生。我等相與，發菩提心，行菩薩道。菩薩摩訶薩，救苦為資糧，解怨為要行；不捨衆生，忍苦為本。我等今日，亦復如是；起勇猛心、起慈悲心、等如來心，承諸佛力，樹道場幡、擊甘露鼓，秉智慧弓、執堅固箭。普為四生六道，三世衆怨，父母師長，六親眷屬，解怨釋結；已結之怨，一切捨施；未結之怨，畢竟不結。仰願諸佛、諸大菩薩！以慈悲力、以本願力、以神通力，同加覆護，折伏攝受；令三世無量衆怨，從今日去，乃至菩提；解怨釋結，無復怨對；一切衆苦，畢竟斷除。相與至心，等一痛切，五體投地。奉為四生六道，三世衆怨，父母師長，一切眷屬；歸依世間，大慈悲父。

南無彌勒佛
南無善意佛

南無釋迦牟尼佛
南無離垢佛

南無月相佛	南無大名佛
南無珠髻佛	南無威猛佛
南無師子步佛	南無德樹佛
南無歡釋佛	南無慧聚佛
南無安住佛	南無有意佛
南無鴛伽陀佛	南無無量意佛
南無妙色佛	南無多智佛
南無光明佛	南無堅戒佛
南無吉祥佛	南無寶相佛
南無蓮華佛	南無那羅延佛
南無安樂佛	南無智積佛
南無德敬佛	
南無堅勇精進菩薩	南無金剛慧菩薩
南無無邊身菩薩	南無觀世音菩薩

又復歸依，如是十方，盡虛空界，一切三寶。如是三世，一切衆怨；今日在六道中，已受怨對者；願以佛力、法力、賢聖力，令此衆生，悉得解脫。若於六道中，應受對者，未受對者；願以佛力、法力、賢聖力，令此衆生，畢竟不復，入於惡趣；畢竟不復，惡心相向；畢竟不復，楚毒相加。一切捨施，無怨親想；一切罪咎，各得消除；一切怨對，皆得解脫。同心和合，猶如水乳；一切歡喜，猶如初地；壽命無窮，身心永樂。天宮淨土，隨意往生；念衣衣來，想食食至；

無復怨對，鬪諍之聲。四體不為變動所侵，五情不為塵惑所染。衆善競會，萬惡爭消；發起大乘，修菩薩行。四等六度，一切具足；捨生死報，同成正覺。

今日道場，同業大衆！何者怨根苦本？眼貪色，耳貪聲，鼻貪香，舌貪味，身貪細滑；常為五塵之所繫縛，所以歷劫長夜，不得解脫。又復六親，一切眷屬，皆是我等，三世怨根；一切怨對，皆從親起。若無有親，亦無有怨；若能離親，即是離怨。

何以故爾？若各異處，遠隔他鄉；如是二人，終不得起怨恨之心。得起怨恨，皆由親近。以三毒根，自相觸惱；以觸惱故，多起恨心。所以親戚眷屬，亟生責望；或父母責望於子，或子責望父母；兄弟姊妹，一切皆然。更相責望，更相嫌恨；小不適意，便生瞋怒。若有財寶，親戚競求；貧窮之日，初無憂念。又得者愈以為少，愈得愈為不足。百求百得，不以為恩；一不稱心，便增忿憾。是則纔懷惡念，遂起異心；故結讎連禍，世世無窮。

推此而言，三世怨對，實非他人，皆是我等，親緣眷屬。當知眷屬，即是怨聚；豈得不人人，慙懃悔過？宜各至心，五體投地。奉為有識神以來，至於今日；經生父母，歷劫親緣，於六道中，結怨對者；若對非對，若輕若重；今日若在地

獄道者、若在畜生道者、若在餓鬼道者、若在阿修羅道者、
若在人道者、若在天道者、若在仙道者，今日現在眷屬中者
。如是三世，一切衆怨，各及眷屬；我等今日，以慈悲心，
無怨親想；等諸佛心，同諸佛願。普皆奉為，歸依世間，大
慈悲父。

南無彌勒佛	南無釋迦牟尼佛
南無梵德佛	南無寶積佛
南無華天佛	南無善思議佛
南無法自在佛	南無名聞意佛
南無樂說聚佛	南無金剛相佛
南無求利益佛	南無遊戲神通佛
南無離闇佛	南無名天佛
南無彌樓相佛	南無衆明佛
南無寶藏佛	南無極高行佛
南無提沙佛	南無珠角佛
南無德讚佛	南無日月明佛
南無日明佛	南無星宿佛
南無師子相佛	南無違藍王佛
南無福藏佛	
南無棄陰蓋菩薩	南無寂根菩薩
南無無邊身菩薩	南無觀世音菩薩

又復歸依，如是十方，盡虛空界，一切三寶。願以佛力、法力、大地菩薩力、一切賢聖力，令我等父母親緣，於六道中，有怨對者，各及眷屬；皆悉同時，集此道場；共懺先罪，解諸怨結。若有身形拘礙，不得到者；願承三寶之力，攝其精神，皆悉同到。以慈悲心，受我等今日懺悔；一切怨對，願蒙解脫。

道場大衆！宜各人人，心念口言：我等從無始有識神以來，至於今日；於經生父母，歷劫親緣，姑姨伯叔，內外眷屬；以三毒根，起十惡業。或以不知、或以不信、或以不修，以無明故，起諸怨結。於父母眷屬，乃至六道中，亦有怨對。如是等罪，無量無邊。今日懺悔，願乞除滅。又復無始以來，至於今日；或以瞋恚、或以貪愛、或以愚癡，從三毒根，造種種罪。如是罪惡，無量無邊。慚愧懺悔，願乞捨施。

又復無始以來，至於今日；或為田業、或為舍宅、或為錢財，起怨對業；於眷屬中，備加殺害。如是種種殺罪，不可具說；所起怨對，無有罷期。今日慚愧，發露懺悔。願父母六親，一切眷屬；以慈悲心，受我懺悔；一切捨施，無復恨想。乃至盜竊、邪淫、妄語，十惡、五逆，無不備作；妄想顛倒，攀緣諸境，造一切罪。如是等罪，無量無邊。或於父母邊起、或於兄弟姊妹邊起、或於姑姨伯叔邊起，乃至有識神以來，至於今日，於六親眷屬邊起。如是等罪，如是罪因苦

果，受對劫數，怨結多少；惟有十方，一切諸佛，大地菩薩，盡知盡見。如諸佛菩薩，所知所見，罪量多少，怨對劫數；於未來世，方受對者；我等今日，慚顏哽慟，銜悲自責；改往修來，不敢復作。惟願父母、親緣眷屬！以柔軟心、調和心、樂善心、歡喜心、守護心、等如來心，受我等今日懺悔；一切捨施，無怨親想。又願父母親緣，一切眷屬，若有怨對，在六道中者；亦願六道一切衆生，同共捨施；三世怨結，一時俱盡。

從今以去，至於道場；永離三塗，絕四趣苦。一切和合，猶如水乳；一切無礙，等於虛空；永為法親，慈悲眷屬。各各修習，無量智慧；具足成就，一切功德。勇猛精進，不休不息；行菩薩道，無有疲倦。等諸佛心，同諸佛願。得佛三密，具五分身；究竟無上菩提，成等正覺。

今日道場，同業大眾！相與已解父母怨竟，次復應解師長怨結。自大聖已還，體未圓極；至於無生法忍，猶為三相遷滅。在於如來，尚假苦言；令惡衆生，因茲悟道。而德明化物，猶現此辭；況復凡愚，理絕淨境？今善惡雜糅，明白未分，豈能頓離三業之失？若聞所說，應當慚愧；師長恩德，深自悔責；不得驚疑，而懷惡念。經言：雖復出家，猶未解脫。今雖出家，不得便言：無復諸惡。在俗之人，不得便言：都無其善。且置是事。如經所說，佛告大眾：汝當緣念，師

長之恩。父母雖復生育訓誨，而不能使離於三塗。師長大慈，誘進童蒙，使得出家，稟受具戒；是即懷羅漢胎，生羅漢果；離生死苦，得涅槃樂。師長有此出世恩德，誰能上報？若能終身行道，止可自利，非報師恩。佛言：天下善友，莫過師長。

今日道場，同業大眾！如佛所說，師長有如此恩德；而未曾發念，報師長恩；或復教誨，亦不信受。乃至麤言，起於誹謗；橫生是非，使佛法衰落。如是等罪，何當免離三塗？此之苦報，無人代者。及其捨命，樂去苦歸；神情慘惱，意用昏迷；六識不聰，五根喪敗。欲行足不能動，欲坐身不自立；假使欲聽法言，則耳無復所聞；欲視勝境，則眼無復所見。當如此時，共思今日禮懺，豈可復得？但有地獄，無量衆苦。如是苦報，自作自受。所以經言：愚癡自恃，不信殃禍，謗師、毀師，憎師、嫉師；如是等人，法中大魔，地獄種子！自結怨對，受報無窮。

如華光比丘，善說法要。有一弟子，恆懷憍慢；和尚為說，都不信受。即作是言：我大和尚，空無智慧，但能讚歎虛空之事；願我後生，不復樂見。於是弟子，法說非法，非法說法。雖持禁戒，無有毀犯；以謬解故，命終之後，如射箭頃，墮阿鼻獄；八十億劫，恆受大苦。

今日道場，同業大眾！如經所說，豈得不人人，起大怖畏？止於和尚，發一惡言；墮阿鼻獄，八十億劫。何況出家以來，至於今日；於和尚邊，所起惡業，其罪無量？判捨身形，同彼無疑。何以故爾？和尚闍黎恆加訓誨，而未曾如法修行；於諸師長，多生違逆。或復給與，而無厭足；或師瞋弟子，或弟子恨師。於三世中，喜怒無量。如是等罪，不可稱計。

經言：起一瞋心，怨對無量。如是怨對，非但六親；師徒弟子，嫌恨亦甚。又復同房共住，上中下座；不能深信出家，是遠離法；不知忍辱，是安樂行；不知平等，是菩提道；不知離妄想，是出世心。師及弟子，同房共住；結業未盡，互相違戾；忿諍之心，紛然亂起；所以世世不得和合。

又出家人，或同學業、或復共師；升進之日，便含毒懷瞋。而不自言：宿習智慧，彼有福德，我無善根。有漏之心，亟生高下；多起鬪諍，少能和合。不能推厚居薄，更相嫌恨。不省己非，惟談他短；或以三毒，更相讒謗。無忠信心、無恭敬意；何處復念：我違佛戒？乃至高聲大語，惡罵醜言；師長教誨，都無信受。上中下座，人各懷恨；以懷恨故，更相是非；於惡道中，多有怨對。是非怨對，皆是我等，師徒弟子，同學共住，上中下座；起一恨心，怨對無量。所以經言：今世恨意，微相憎嫉；後世轉劇，至成大怨。何況終身

，所起惡業？

今日道場，同業大眾！各不自知，在何道中，於諸師長，上中下座，起諸怨結？如是怨對，無有窮盡。無形之對，無有年期，亦無劫數；當受苦時，不可堪忍。所以菩薩摩訶薩，捨怨親心，離怨親想；以慈悲心，平等攝受。相與今日，已發菩提心、已發菩提願；宜應習行菩薩之行：四無量心、六波羅蜜、四弘誓、四攝法。如諸佛菩薩，所行本行；我等今日，亦應習行；怨親平等，一切無礙。從今日去，至於菩提；誓當救護，一切衆生；令諸衆生，究竟一乘。相與至心，五體投地。奉為有識神以來，經生出家，和尚闍黎，有怨對者；同壇尊證，有怨對者；同學眷屬，上中下座，有怨對者；有緣無緣，廣及十方，四生六道，三世衆怨；若對非對，若輕若重，各及眷屬。我等若於六道，一切衆生中，有怨對者；於未來現在，應受對者；今日懺悔，願乞除滅。若六道一切衆生，各各有怨對者；我等今日，以慈悲心，無怨親想；普為三世衆怨，求哀懺悔。願皆捨施，無復惡念相加，懷毒相向；願六道一切衆生，亦同捨施，一切歡喜。從今解結，無復瞋恨；各自恭敬，念報恩心。等諸佛心，同諸佛願。各各至心，歸依世間，大慈悲父。

南無彌勒佛

南無釋迦牟尼佛

南無見有邊佛

南無電明佛

南無金山佛	南無師子德佛
南無勝相佛	南無明讚佛
南無堅精進佛	南無具足讚佛
南無離畏師佛	南無應天佛
南無大燈佛	南無世明佛
南無妙音佛	南無持上功德佛
南無離闇佛	南無寶讚佛
南無師子頰佛	南無滅過佛
南無持甘露佛	南無人月佛
南無喜見佛	南無莊嚴佛
南無珠明佛	南無山頂佛
南無名相佛	南無法積佛
南無慧上菩薩	南無常不離世菩薩
南無無邊身菩薩	南無觀世音菩薩

又復歸依，如是十方，盡虛空界，一切三寶。願以佛力、法力、大地菩薩力、一切賢聖力，令三世無量衆怨，若對非對，盡空法界，一切衆生；皆同懺悔，解怨釋結。一切捨施，無怨親想；一切和合，猶如水乳。一切歡喜，猶如初地；一切無礙，猶如虛空。從今以去，至於菩提；永為法親，無別異想；常為菩薩，慈悲眷屬。

又以今日，禮拜懺悔、解怨釋結，功德因緣；願和尚闍黎，

同壇尊證，同學弟子，上中下座，一切眷屬，有怨對者；乃至四生六道，各有三世衆怨，未解脫者；今日若有在天道者、在仙道者、在阿修羅道者、在地獄道者、在餓鬼道者、在畜生道者、在人道者，今日現在眷屬中者。如是十方，三世衆怨，若對非對，各及眷屬；從今以去，至於菩提；一切罪障，皆得除滅；一切怨對，畢竟解脫。結習煩惱，永得清淨；長辭四趣，自在受生。念念法流，心心自在；六波羅蜜，具足莊嚴。十地行願，無不究竟；得佛十力，神通無礙。早具阿耨多羅三藐三菩提，成等正覺。

今日道場，同業大眾！前是總相，為三世衆怨，解諸怨結。此下自淨，宜督其心。相與今日，何故不得解脫？進不覩面前授記，退不聞一音演說；良由罪業深厚，怨結牢固。非惟不見前佛後佛，菩薩賢聖；亦恐十二分教，聞聲傳響，永隔心路。惡道怨對，無從得免。捨此形命，方沈沸海；輪轉三塗，備歷惡趣。何時當得復此人身？發如是意，實有切情之悲；運如是想，不覺痛心之苦。

相與已得，仰淪風化，割愛辭親，捨榮棄俗，更無異緣。豈得不與時競，各求所安？若不志意堅強，捍勞忍苦，銜悲惻愴者；忽爾身被篤疾，中陰相現；獄卒羅刹，牛頭阿旁，殊形異狀，一朝而至。風刀解身，心懷怖亂；眷屬號泣，無所覺知。當此之時，欲求今日禮懺，起一善心，豈可復得？但

有三塗無量衆苦。

今日大衆！各自努力，與時馳競。若任情適意，則進趣理遲；捍勞忍苦，則勇猛心疾。所以經言：悲是道場，忍疲苦故；發行是道場，能辦事故。是知萬善莊嚴，不勤無託；欲度巨海，非舟何寄？若有願樂之心，不行願樂之事；心事不即，直未見果。如絕糧之人，心存百味；於其飢惱，終無濟益。當知欲求勝妙果報，必須心事俱行。相與及時，生增上心，懷慚愧意；懺悔滅罪，解諸怨結。脫更處闇，開了末期；人皆解脫，莫追後悔。各各至心，等一痛切，五體投地；歸依世間，大慈悲父。

南無彌勒佛	南無釋迦牟尼佛
南無定義佛	南無施願佛
南無寶衆佛	南無衆王佛
南無遊步佛	南無安隱佛
南無法差別佛	南無上尊佛
南無極高德佛	南無上師子音佛
南無樂戲佛	南無龍明佛
南無華山佛	南無龍喜佛
南無香自在王佛	南無大名佛
南無天力佛	南無德鬘佛
南無龍首佛	南無善行意佛

南無因莊嚴佛 南無智勝佛
南無無量月佛 南無實語佛
南無日明佛
南無藥王菩薩 南無藥上菩薩
南無無邊身菩薩 南無觀世音菩薩

又復歸依，如是十方，盡虛空界，一切三寶。我等積集罪障，深於大地；無明覆蔽，長夜不曉。常隨三毒，造怨對因；致使迷淪三有，永無出期。今日以諸佛菩薩，大慈悲力，始蒙覺悟；心生慚愧，至誠求哀，發露懺悔。願諸佛菩薩，慈悲攝受！以大智慧力、不思議力、無量自在力、降伏四魔力、滅諸煩惱力、解諸怨結力、度脫衆生力、安隱衆生力、解脫地獄力、濟度餓鬼力、救拔畜生力、攝化阿修羅力、攝受人道力、盡諸天諸仙漏力、無量無邊功德力、無量無盡智慧力，令四生六道，一切衆怨，同到道場，受我等今日懺悔。一切捨施，無怨親想；所結怨業，同得解脫。永離八難，無四趣苦；常值諸佛，聞法悟道。發菩提心，行出世業；四等六度，深心修習。一切行願，等階十地；入金剛心，俱成正覺。

今日道場，同業大眾！夫怨對相尋，皆由三業，莊嚴行人，嬰諸苦報。相與既知是衆苦之本，宜應勇猛，挫而滅之。滅苦之要，惟有懺悔。故經稱歎，世二健兒：一不作罪，二能

懺悔。大眾今日，將欲懺悔；當潔其心，整肅其容。內懷慚愧，悲暢於外；起二種心，則無罪不滅。何者二種心？一慚，二愧。慚者慚天，愧者愧人。慚者自能懺悔，滅諸怨對；愧者能教他人，解諸結縛。慚者能作衆善，愧者能見隨喜。慚者內自羞恥，愧者發露向人。以是二法，能令行人，得無礙樂。相與今日，起大慚愧，作大懺悔；至心求哀，四生六道。何以故爾？經言：一切衆生，皆是親緣。或經為父母，或經為師長；乃至經為兄弟姊妹，一切皆然。良由墮無明網，不復相知。既不相知，多起觸惱；以觸惱故，怨對無窮。大眾今日，覺悟此意；至誠懇惻，苦切用心。必令一念，感十方佛；一拜斷除，無量怨對。等一痛切，五體投地；重復歸依世間，大慈悲父。

南無彌勒佛

南無釋迦牟尼佛

南無定意佛

南無無量形佛

南無明照佛

南無寶相佛

南無斷疑佛

南無善明佛

南無不虛步佛

南無覺悟佛

南無華相佛

南無山主王佛

南無大威德佛

南無徧見佛

南無無量名佛

南無寶天佛

南無住義佛

南無滿意佛

南無上讚佛

南無無憂佛

南無無垢佛 南無梵天佛
南無華明佛 南無身差別佛
南無法明佛 南無盡見佛
南無德淨佛
南無文殊師利菩薩 南無普賢菩薩
南無無邊身菩薩 南無觀世音菩薩

又復歸依，如是十方，盡虛空界，一切三寶。仰願三寶，同加攝受！令我等所懺除滅，所悔清淨。又願今日，同懺悔者，從今以去，乃至菩提；一切怨對，皆得解脫。一切衆苦，畢竟消滅；結習煩惱，永得清淨。長辭四趣，自在受生；親侍諸佛，面奉尊記。六度四等，無不備行；具四辯才，得佛十力。相好嚴身，神通無礙；入金剛心，成等正覺。

慈悲道場懺法卷第五

七佛滅罪真言

離婆離婆帝 求訶求訶帝 陀羅尼帝 尼訶囉帝 毗黎你帝
摩訶伽帝 真陵乾帝 娑婆訶（七遍）

補闕真言

南無喝囉怛那 哆囉夜耶 佉囉佉囉 俱住俱住 摩囉摩囉
虎囉 吽 賀賀 蘇怛拏 吽 潑抹拏 娑婆訶（三遍）

讚

四生往返 六道回旋 皆由怨對闇相傳
願仗佛哀憐 解釋怨愆 萬壑縱悠然
南無難勝地菩薩摩訶薩 (三唱)

出懺

妙相巍巍，麗中天之杲日；慈風蕩蕩，振大地之春雷。灑甘露於塵心，灌醍醐於沙界；有求皆應，無願不從。如來舒五眼之光明，融會作五時之佛事。上來奉為，求懺我等，修崇慈悲道場懺法。今當第五卷，禮誦云週，功勳將畢。集五德之高流，瞻五天之妙相；然五分之真香，點五方之慧炬。偈讚一音，華飛五色；供饌聊為芹獻，禮佛効於葵傾。作觀誦經，殊功異德；先伸回向佛菩提，然後普資周法界。出生殊利，奉為求懺我等，懺未懺之罪垢，集未集之勝因。伏願：五蘊之雲自空，五衰之相不現；五根五力而具足，五蓋五障以消鎔。發明五種之心華，持守五支之淨戒。現存眷屬，希五福以咸臻；過去宗親，得五明之成就。冥漠幽沈之類，苦輪息而共證菩提；仇讎執對之徒，怨業解而同生善道。略略微文悔過，細細業果難除；一一仰於緇流，重重求於懺悔。

讚

梁皇懺 五卷功德力 願滅信人五逆罪
親證菩薩難勝地 懺文舉處罪華飛
解了怨 懺了罪 消災增福慧
蓮池海會願相逢 彌陀佛前親受記
南無蓮池會菩薩摩訶薩 (三唱)

舉讚

梁皇懺 五卷已全周 回向四恩并三有
拜懺我等增福壽 惟願亡靈往西遊
難勝地菩薩 惟願哀納受
南無登雲路菩薩摩訶薩 (三唱)